

Il chalender dal Grischun talian

Ina cronica da la vita culturala

DA GUIU SOBIELA-CAANITZ

■ **Tgi che sa chatta cun ina communad rumantscha durant l'advent enonuscha il «Chalender ladin» (dapi 1911), il «Calender per mintga gi» (dapi 1922) u il «Calender Romontsch» (dapi 1859). Quels cudeschs vegnan edids e vendids fin november ed entschatta december.** «Ina cronica da l'onn passà, ligns ed in register da las autoritads ecclesiasticas e civilas completteschan il chalender ch'ha in caracter regiunal e practic ed appartegna a la litteratura da diever la pli populara (...). En il 20. tsch[ientaner] èn [ils chalenders] daventads purtaders culturals cun in cuntegn ch'emprova da dar in maletg da la vita e cultura (...) cun ediziuns da fin 5000 exemplars» (1). Dapi 1919 datti er in chalender dal Grischun talian: L'«Almanacco del Grigioni Italiano», edì a Cuira da la «Pro Grigioni Italiano» (Pgi) e stampà da Menghini a Poschiavo. L'edizium per 2019 cumpiglia 315 paginas numeradas, numnadamain ina part generala, ina per Mesolcina e Calanca, ina per la Bergiaglia, ina per il Puschlav ed ina per il «calendario». I suondan recensius da quatter artitgels, trais da la part generala ed in da la bregagliotta.

La magistra da Beiva

L'emprima part e la bregagliotta cuntegnan mintgina in necrolog d'Elda Simonett-Giovanoli (1924–2018). Lezza vegn numnada «una Bandiera dell'italianità grigionese» da redactur Remo Tosio, autur da l'emprim necrolog (pp. 14–16). President Oscar Luigi Scalfaro (1918–2012) l'ha nominada «Cavaliere di gran croce dell'ordine al merito della Repubblica Italiana» (p. 14). La Pro Helvetia l'ha lura dà in premi «per sua activad litterara e pedagogica» e la Pgi il Premio Cubetto sco ad ina «felice interprete dello spirito grigionitaliano» (p. 176). Ella era magistra primara a Beiva, oz fracziun da Surses, lezza giada vischnanca italoфона, ed ha cumbattì

«continuamente e con molta tenacia per promuovere e salvare la latinità del piccolo villaggio alpino minacciato dall'inedescamento» (part bregagliotta, Fondazione Giovanoli, p. 176). Ella ha scritblers artitgels en la pressa grischuna ed en l'almanacco, sco era plis cudeschs, t.a. «C'era una volta Bivio» (Menghini, Poschiavo 1992). En l'emprima part da l'«almanacco» ha Tosio scrit anc in essai (pp. 18–19) che fa endament la renovaiziun da la regenza chantunala il zercladur passà. L'autur rapporta detagliadamain davart ils problems da la pbd grischuna avant l'elecziun, ils resultats dal scrutini, quels da la segunda dumbraziun da cedels e la nova repartiziun dals departaments. Da Bumaun 2019 vegn cuss. gov. Jon Domenic Parolini (*1959; educaziun, cultura e protecziun da l'ambient) president da la regenza ed en lezza unic commember da la pbd; la pcd vegn per la paja represchentada da dus cuss. gov., numnadamain vinavant da Mario Cavigelli (*1965; construcziun, traffic e selvicultura) ed en pli da Marcus Caduff (*1973; economia publica e fatgs socials). La regenza nova cumpiglia mo umens.

Perscrutaziuns archeologicas

Nando Iseppi, docent emerità da talian ed istorgia a la scola chantunala, ha scrit en la part generala da l'«almanacco» in essai davart la preistorgia dal Grischun talian. El ha interrogà l'antieru archeolog chantunal Jürg Rageth (pp. 32–38); lez ha declerà: «En il Moesano datti differents lieus d'exchavaziuns. Ins ha chattà bler material en las fossas ed ils abitadis da Castaneda, sco er en las fossas da Mesocco, Cama e Roveredo (...). A Castaneda han ins chattà var 150 fossas cun equipament: Fivlas, ureglins, sardellas, chantas, cheramias euv. (...). Ins ha era chattà material neolitic e dal temp da bronz; ils chats da Mesocco èn mesolitics e neolitics, quels cun equipament da fossa dal temp da fier e dal roman. A Cama e Sta. Maria (Calanca)

datti fossas dal temp da fier e dal roman, a Roveredo fossas romanas e rests d'abitadis medievals temprivs (...). A Castaneda han ins scuvrì fastizs d'arader ed in vitget dal neolitic tardiv che cumprovan ch'ins duvrava l'arader sper la zappa en il terz millenni a. Cr. En las fossas da Castaneda devi pliras crias e sardellas dal bronz dal Gavel, 5avel e quart tschientaner a. Cr. (...). A Roveredo han ins chattà in vast abitadi cun oravant tut material dals temps da bronz e da fier, insatge dal temp roman e restanzas medievals (...). Il traffic da Casaccia gieva sur il Pass dal Set giu vers il Surses. Dal 2007–2008 han l'Academia bavara da las ciencias ed il Servetsch archeologic dal Grischun perscrutà ina planira auta sin il Pass dal Set. Là han ins scuvrì bleras armas (sferas da plom per schlingia, frizzas per catapult), dentant era 70–80 pals da fier per tendas, passa 400 guttas per chalzers ed auters objects dal temp roman che cumprovan il transit d'in'armada romana ils onns 16–15 a. Cr. e, forse curt oravant, la preschientscha d'in impurtant champ militar (...) sco er indizis d'ina confrunziun tranter schuldada romana ed indigena (...). A Mesauca e Castaneda devi bajetgs sin pals verticals che pussavan sin ina rampa (...). A Poschiavo han ins scuvrì in abitadi roman; ins ha chattà munaidas romanas e cheramica (...) sco era var tschinquanta fossas dal temp roman e dal temp medieval tempriv» (2). La davosa pagina da l'essai cuntegn in plan da Poschiavo cun la posiziun dals chats archeologics da fossas. En las quatter valladas en dumonda vanzi anc bler da perscrutar.

1. Gion Deplazes (1918–2015) en: *Stiftung Historisches Lexikon der Schweiz (HLS), Lexikon Istorice Retic. Tom 1, Cuira (Desertina, ISBN 978-3-85637-390-0) 2010, p. 174, chavazzin «Chalenders».*

2. V. era Jürg Rageth en: *Stiftung Historisches Lexikon der Schweiz (HLS), Lexikon Istorice Retic. Tom 2, Cuira (Desertina, ISBN 978-3-85637-391-7), pp. 195–198, chavazin «Preistorgia».*